

媿生叢錄

宣統紀元八
月琴于江甯

江陰繆先生札

審言仁兄有道昨示隨筆二冊閱通淹雅選理尤精在
讀書脞錄筠軒叢錄之間必傳之作原書奉趙略籤數
條無關宏指昔年見吳勤惠公以禮記訓纂贈丁儉卿
師次日卽還駁正各條皆數百言先輩真不可及也手
答卽請箸安弟荃孫頓首

余於乙未丙申之間得病幾殆日率懶臥因以窳生自號名其文曰窳集詩曰窳作筆記曰窳記訖於病已未改此號念昔呻吟之中不廢觀書雖至饕飧告匱此志未輟每日夕篝鐙瞪目屬思若有所亡孺人握鍼管爲兒輩補紉衣履偃坐其側輒以他語亂之一夕擁被臥矣持世說新語就鐙觀之得假譎篇王文度弟阿智事有方知興公之詐語頓悟汪容甫自序中受詐興公使此亟褫衣起欲錄之孺人掣余足曰冷請俟明日余不可孺人又笑曰癡余曰癡則甘之曾十七八年事耳家

幸粗立而孺人於去年四月死矣喪此良耦居常邑邑
遂改竄生爲媿生以余生於世視孺人有媿也今料理
筆記且刻數卷以質知友孺人若在又必笑余之癡然
余癡尙存如孺人之明慧又安在邪拉雜寫此以抒余
慟其書之差違固不計也宣統紀元八月李詳記於冶
城寓廬

媿生叢錄卷一

揚州興化李詳審言

吾鄉任子田先生字林考逸江鄭堂漢學師承記謂丁小雅曾箸此書彙本存子田處子田竊其書而署其名小雅因作書徧告諸人云云詳案小雅游京師與子田交最熟考逸後附小雅之說姓氏粲然子田輯考逸時廣閱羣籍遂得從容撰集小學鉤沈其勢自易亦何藉於小雅而爲郭象盜莊之舉無論當時諸老絕無此說卽小雅逝後許周生所作丁教授傳亦以字林考逸列

入小雅爲人校定刊行書內不知鄭堂當日厚誣兩君
何意余疑有愛憎之見也

錢少詹大昕通鑑胡注辨正

卷二

後梁開平元年名其所

居爲宮殿妻爲皇后注茂貞自爲岐王而妻偁皇后妻
之貴踰於其夫矣案皇后當作王后蓋取戰國及諸侯
王妻偁后之例注非是詳案蘇文忠鳳翔八觀李氏園
詩空使後世人聞名頸猶縮自注俗猶呼皇后園蓋茂
貞謂其妻也據此知通鑑不誤

易林豫之旅云文山蹲鴟肥腓多脂案易林後漢人撰

託名焦贛者僞也此自是用史記貨殖傳語旣以蹲鴟狀芋故亦以肥腠多脂所以狀蹲鴟者狀之今芋無小大其涎如脂是其狀王氏念孫廣雅疏證云芋雖大不得有脂易林所云又似指鳥而言此拘於成說矣

昌黎先生送王秀才序謂阮籍陶潛爲事物是非相感觸於是有託而逃此最爲兩君知已是非二字尤見其隱

漢書地理志景武間文翁爲蜀守教民讀書及司馬相如游宦京師諸侯以文辭顯於世鄉黨慕循其迹後有

王褒嚴遵揚雄之徒文章冠天下繇文翁倡其教相如
爲之師孟堅此言蜀承文翁之教王楊文章師法相如
而已非親爲之師也蜀志秦宓傳文翁遣相如東受七
經還教吏民於是蜀學比於齊魯故地理志云文翁倡
其教相如爲之師案宓言雖有所自然誤讀班志以相
如爲教授之師常璩華陽國志云文翁爲郡守遣雋士
張叔等十八人東詣博士受七經還以教授蜀學比於
齊魯其蜀都士女贊云叔文播教變風爲雅道洽化遷
我實西魯自注張寬字叔文文翁遣寬詣博士東受七

經還以教授璩書多從承祚國志而此獨不取宓傳歸之相如蓋以相如游梁已久必不及詣博士受業也相如景帝時爲武騎常侍後病免游梁文翁傳景帝末爲蜀郡守地理志言景武間爲蜀守則相如宦游在外爲文翁驅使所不及可信也

姜夔白石道人歌曲琵琶仙詞序云吳都賦云戶藏烟浦家具畫船惟吳興爲然余往見此語甚以爲疑蓋太冲之賦已云家有鶴膝戶有犀渠不應再用複句及閱思適齋集云此唐李庾西都賦語吳山尊學士亦曾持此以難彼者爲之豁然竟日

周王褒與周宏讓書視陰愒日猶趙孟之徂年負杖行
吟同劉琨之積慘案左傳昭公元年趙孟視蔭曰朝夕
不相及誰能待五后子出而告人曰趙孟將死矣主民
翫歲而愒日其與幾何劉琨答盧諶書國破家亡親友
凋殘負杖行吟則百憂俱至塊然獨坐則哀憤兩集時
復相與舉觴對膝破涕爲笑排終身之積慘求數刻之
暫懽宏讓答書云方當視陰數箭排愁破涕亦以趙劉
自況與王來書相副又褒答書云河陽北臨空思鞏縣
霸陵南望還見長安案潘岳西征賦眷鞏洛而掩涕思

纏綿於墳塋李善注河南郡圖經潘岳父冢鞏縣西南
三十五里王粲七哀詩南登霸陵岸回首望長安子淵
身羈異姓思歸不得故其言如此注家俱未揭出則此
書之情不達矣

李申耆養一齋集江陰新刻本其小喬墓詩云銅雀傾
來歌舞歇左騏譽姐阿誰知案文選繁欽與魏文帝牋
左驥史妲譽姐名倡善注魏志文帝令杜夔與左驥等
於賓客之中吹笙鼓瑟其史妲譽姐蓋亦當時樂人申
耆所用本此而刻者譌爲騏譽

孫頤谷先生讀書脞錄

卷五

云張萱疑耀引許氏說文畫

嫫舜妹嫫或作嫫案說文女部無嫫字其嫫字注云女
侍曰嫫支部黠字注則云舜女弟名黠首並無畫嫫舜
妹不知張氏何所據而爲此說詳案羅泌路史有虞氏
紀子萃注世傳瞽叟與弟象每欲殺舜其妹嫫首每爲
之解許說文云或作畫嫫張氏之言殆出於此

文心雕龍知音篇古來知音多賤今而思古所謂日進
前而不御遙聞聲而相思昔儲說始出于虛初成秦皇
漢武恨不同時旣同時矣則韓囚而馬輕案垵朴子廣

譬篇貴遠而賤近者常人之恆情也信耳而遺目者古今之所患也是以秦王歎息於韓非之書而想其爲人漢武慷慨於相如之文而恨不同世及旣得之終不能拔或納說而誅之或放之乎冗散彥和之言與之相似李義山詩有效長吉擬沈下賢韓翃舍人卽事杜工部蜀中離席諸題皆擬體也

北齊書文苑顏之推傳觀我生賦云王凝坐而對寇白詡拱以臨兵殿本考證云案此用顧榮事詡當作羽詳案後漢書獨行向栩傳張角作亂栩上便宜頗譏左右

不欲國家興兵但遣將於河上北向讀孝經賊自當消

滅此之推所謂拱以臨兵也傳寫譌作白詡耳

後見盧抱經觀

我生賦補注引錢莘楣說白詡當是向栩附記於此以示與錢偶合

韓退之詩好翻用成語如猿鳴鐘動不知曙

謝靈運從斤竹澗越

嶺西行詩猿鳴誠知曙

誰云少年別流淚各沾衣

沈約別范安成詩生平少年日

分手易前期

春氣漫誕最可悲

宋玉九辨皇天平分四時今竊獨悲此凜秋

是也

南史吉士瞻傳少有志氣徵士吳苞見其姿容勸以經

學因誦鮑照詩云豎儒守一經未足識行藏案此江淹

雜體擬鮑之作淹所擬陶公詩今亦在陶集蓋在當時

淹實託之諸人迨淹集流傳始歸之淹或兩存之也淹擬休上人詩日暮碧雲合佳人殊未來唐人亦用爲休上人詩考見王楙野客叢書

朱笥河先生請選擇永樂大典古書刊布於世當時

朝廷命館臣從中編輯凡爲書三百八十五種四千九百二十六卷此議康熙時徐健庵司寇已發之徐序高澹人所刻編珠云皇史宬永樂大典鼎革時亦有散失往者嘗語詹事值

皇上稽古右文千古罕邁當

請命儒臣重加討論以其祕本刊錄頒布用表揚前哲

之遺墜於萬一余老矣詹事孜孜好古幸他日勿忘此言也

桂未谷說文解字義證附錄云梁書孔子祛傳高祖爲五經講疏及孔子正言專使子祛檢閱羣書以爲義證馥爲說文之學亦取證於羣書故題曰義證詳案段琳堂札樸序謂桂有說文正義六十卷段聞於李氏李與未谷同官滇南者未谷後卒於滇或其晚定之本改今

名與

未谷札樸亦名老落札樸見焦里堂道聽錄

王粲登樓賦鍾儀幽而楚奏莊舄顯而越吟庾信哀江